

dubiae esse videantur, melior, opinor, est haec ratio quam lectiones barbaras et manifesto falsas intactas relinquere, offendicula lectori futuras eumque a recta linguae Graecae scientia diversuras. Corruptelam detegere et indicare non raro dimidium remedii est, et conjecturas quamvis dubias aut falsas proponere aliquando viam ad veram lectionem ostendit. Exegesis sive explicationem et similium locorum collatione illustrationem neglexi, quum jam alibi eas copiose tractaverim. Non paucae virorum doctorum conjecturae temere et inconsulto in textum receptae, aliae immerito neglectae sunt. Codicum lectiones virorumque doctorum conjecturas manifesto falsas plerumque neglexi. Interpunctionem rectam, quae tantum auxilium ad facilem auctoris lectionem et intelligentiam confert, sed quae nimis saepe negligi solet, sedulo curavi, punctis multo paucioribus quam solet fieri notatis. In annotatione brevitati quantum potui consului.

Si forte alicubi ingravescente senectute (octogesimum enim quintum aetatis annum ago) nonnulla errata fecerim, facile me a lectore benevolo excusationem et veniam impetraturum esse confidenter spero.

Nihil amplius habeo quod addam nisi Horatianum illud, 'Si quid novisti rectius istis, | Candidus imperti; si non, his utere mecum.'

Scribebam Brightoniae, Januarii die 31. 1904.

---